

Hexenrede 2023

Servus alle midanand, mir griaßat eich herzlich,
vermisst hand mir Hexa uich alle ganz schmerzlich.
3 Jaor lang hand mir os scho nemme gsea,
an osram 30-jähriga send mir d's letschd m'l dau
gwea.

Kennad ihr eich no erinnra? Was für a Spektakel,
(war des schea,) als mir send da Hasaberg
naufgwackelt,
onser Jubiläum hammer gfeiert mit dir ond viele
Gäst,
Marcus sag selber, des war doch a geils Feschd.

Doch auf oin Schlag warad mir von soma komischa
Virus umgeba,
der Sauhond hat umkrempelt onser ganzes Leba.
Dahoim semmer ghockt bei Kirche, Küche, Kind,
dao hat für ons tatsächlich mal gweht a ganz
anderer Wind.

Mir mussdad onser Leba ganz neu gestalda,
ond zu alle Leut da Abstand eihalda,
ons blieb nix anders übrig als dau mitzommacha,
da wars selbst ons Hexa nemme zom lacha.

Dass onser Hexaspruch Kirche, Küche, Kind,
mal so an ganz anderer Wind mit sich bringt,
hätt von uns bestimmt koiner dacht,
i erzähl euch, was des hat mit ons gmacht.

An manch geschlossener Tür war groß geschrieba:
*„Wär'n Sie mal lieber zu Haus geblieba,
bei uns gilt a Abstandgebot, ganz streng,
nutzad se mal besser onser digitales Deng,
weil aufgrund der überaus hoha Inzidenz,
gibt's alles bloß no per Video-Konferenz“.*

Also semmer dahoim halt in'd Küche oder au glei
ins Bett,
weil onsre Kender hand gsprent des komplette
Internet,
so wars oft net möglich zum Chatta oder Shoppa,
oder gar Netflix im Fernseher zom gugga,
aus lauter Verzweiflung macht Hex da
Frühjahrsputz,
ond näht hunderte von Mund-Nasa-Schutz,
denn Sicherheit war au ons net einerlei,
ond send romgloffa mit dr Eff-Eff-Pe-Zwei.
Doch jetzt war's Zeit, dass sich wieder dreht der
Wind,

weil mir Hexa nämlich scho wieder in
Jubiläumstimmung sind,
wer aufbasst hat, der woiß genau,
mir Hexa feirat heuer 33 Jaor.

Marcus, des duat dir aber fei nix nütza,
dau ka de jetzt au echt koiner schütza,
horch guat zua, was d's Volk so spricht,
mir Hexa ziehat ins Gericht.

Mit deine Gewerbeflächa gats ja au net wirklich
voran,
zom Glück hasch aber ons, weil mir hand an Plan,
gib ons a Grundstück, Oberstotzinga wär guat,
weil des eh an onsrer Einflugschneise liega duat.
A Hexafabrik, dau ka ma viel Kohle verdiena,
des isch a neuer Markt, dean muas ma bediena,
Glaskugla, Kessel, Gewürze ond Besa,
Schultes sag selbst, des isch no ni dau gwesa.
Dau dädat mir logga von nah und fern,
an haufa Tourista, des häddad mir gern.

In onsrer Hexafabrik hätt mr nadierlich no a Eckle
frei,
dau könnt neikomma a neia Bäckerei,
weil, wie mir alle hand wehmütig vernomma,
isch ons dr Stotzinger Kastlerbäck abhanda
komma.

Ons alle isch klar, et lang muas ma schwätza,
so an guada Bäcker, dean muas ma scho schätza.
Jetzt brauch mr an neia, der sodd au was kenna,
den wollad mir dann Super-Bäcker von Stotzinga
nenna.

Ond wia du ons ja kensch - dei Hexaschar -,
hand mir a Idee, des isch doch klar,
damit mir wieder Backwara hand, köschdlich und
lecker,
stardat mir a Casting für „Stotzinga sucht dr Super-
Bäcker“.

Drom ladad mir dr Dieter Bohlen für a Schüri ei,
der kennt sich aus, des muas dann scho sei,
brauchat aber no a Meinung, weam kemmr
vertraua?

Dau bauad mir schwer auf des Urteil dr Stotzinger
Landfrau, dia letschde im Bund isch klar a Stotzinger Hex,
weil Schultes mit dir - des wird NEX.

Nach Stotzinga hat sich verirrt, a blinder Passagier,
sowas hats no et gea, des sag i dir.
Sofort isch gräumt worra, dr Supermaktlada,
damit au ja koiner kommt zu Schada.
Ausrücka hat müssa onsra Stotzinger Feierwehr,

des kennad dr glaub, da gings ganz schein heiß her.
Saga kennad mir dazu ganz hexlich,
so a Biss wär et tödlich, aber sehr schmerzlich,
dia Riesenkrabbaspenn aus de Suptropa,
wollt sich halt a mal in Stotzinga austoba.
Guad ausganga isch am Ende des Dilemma,
jetzt lebt se glücklich gerettet in dr Wilhelma.

Jetzt stellad euch vor, des glaubad ihr net,
was a Drama mit dem schnella Internet.
Es gibt dau an Anbieter, mir wollad dean net
nenna,
aber send ons sicher, a jeder duad dean kenna,
„Dein Kaff verbinden wir nicht“ - was ein Skandal,
d's allerschlimmste isch, ma hat gar koi Wahl,
verweigrad dia doch glatt da Ausbau in Stedda,
grad dia aufm Land, dia muas ma doch redda,
bis i ka dahoim a Internetseite lada,
kasch en dr Badwann da ganza Dag bada.
Marcus, des muasch fei scho nomal chegga,
vor allem no des mit deane viele weiße Flegga.

Leit, was sagat ihr zu deam öffentlicha
Personanahverkehr,
Schultes, wens du net duasch, setzad mir ons zur
Wehr.
Isch doch in ledschder Zeit ganz oft vorkomma,
dass dia hand deine Stotzinger Bürger oifach net
mitgnomma.
Willsch a mal mi'm Ziegle fahra,
denkt sich d'Bahn, heit deamr spara,
D'r Zug fällt aus, isch net in Sicht,
Marcus gib zua - „so geht das nicht“!!
Dr Bus läuft über dr Regio-Alb-Bodensee,
genau d's gleiche Drama, des isch nemme schee.
Des wellad mir bekämpfa und au besiega
und brengat alle Leit bei - ds Hexabäsafliega.
Nau send mir nemme agwiesat auf Bah ond Bus,
und mit deam Ärger isch dann au endlich Schluss.

Ond dann Leit, flieg m'r nach Schduagert mit onsre
Besa,
ond deant am Kretschmann mal ordentlich
d'Levida lesa.

Weil, des mit dem Archäopark isch leider net witzig,
s'gab viele Diskussiona, maischt lang ond au hitzig.
Mir send ganz traurig und sehr betroffa,
dass dr Archäopark hat ab jetzt gschlossa.
Gfonda hat ma damals in dr Vogelherdhöhle
dia Figura vom Mammut, Pferdle ond so ma Löwe.
Abholt worra send se aus onsrer Schatzkammer,
ins Landesmuseum Rastatt, was für a Jammer.

Ohne dr Archäopark ischs für ons nemme d'selbe,
warad mir doch soooo stolz auf des Unesco-
Welterbe.

Dia neia Grundschoal hasch ganz schein lang
renoviert,
ond bei de Einweihungsplanung hats dann wohl
pressiert,
Hättsch ons scho au kenna a bissle eilada,
dann müssdad mir heit net drierberd kloga,
weil von dr neueschda Technik isch ma ed gwicha,
aber trotzdem hand sich Fehler eigischlicha.
So verriegelt dia Diar, nachdeam dia Schulglock
schellt,
ond dia Kendr standad draußa, wia net abholt,
aber bstellt.
Jetzt isch alles schein ond dia Zemmer send nei
möbliert,
doch dein Türschilderplan, dean hasch schlecht
studiert,
weil mir beim durchlaufa hand mir blitzschnell
erkannt,
dass Türschilder von uralte Lehrkräft no hängt an
dr Wand.
Aber Guat isch, onsre Kendr kennad im Heimatort
bleiba,
ond missad net jeden Morga in da Nachbarort eila.

Liabe Leit, jetzt kommad mir glei zom Schluss,
oins i eich aber doch no erzähla muss,
onser Schultes, dr Marcus, guggat'n eich a,
schein sieht er aus, a gstandener Ma,
des glaubat ihr net, was der os hat 3 Jaur lang
gschriebe,
Liebesbrief, äll Dag oin, des isch net übertriebe.
A'gfleht hat er ons: „Wann kennad mir ons endlich
wieder sea“,
„Wenn i bloß an eich denk, duat mir mei Herz sooo
weah“.
Aber jetzt freisch de, gell, dass m'r wieder zamma
send,
ond dei Fleha an ons hat endlich a End.

Auf, jetzt wird gfeiert, mir stoaßad auf onsra
Schnapszahl a,
mit dir ond eich alle - **auf onsre 33 Jahr**,
hoffad, dass alle onsre Wünsche werdad wahr,
verabschieda duat sich jetzt eira Hexaschar.

Stotzinger Hex
Stotzinger Hex Hex
Stotzinger Hex Hex Hex